

ASOCIJACIJA STUDENATA ŠUMARSKOG FAKULTETA
ŠUMARSKI FAKULTET SARAJEVO
Zagrebačka 20,
71000 Sarajevo

STATUT

Sarajevo, 27.12.2016. godine

Na osnovu člana 12., 14., i 18. Zakona o udruženjima i fondacijama FBiH (**“Službene novine Federacije BiH”, broj 45/02**), na skupštini udruženja Asocijacija studenata Šumarskog fakulteta – Šumarski fakultet u Sarajevu održanoj ____ . godine, usvojen je

S T A T U T

ASOCIJACIJE STUDENATA ŠUMARSKOG FAKULTETA

I – OPŠTE ODREDBE

Član 1.

„Asocijacija studenata Šumarskog fakulteta“ u Sarajevu (u daljem tekstu: Udruženje) je nevladina, dobrovoljna, vanstranačka organizacija u kojoj se studenti Šumarskog fakulteta slobodno i dobrovoljno organizuju radi ostvarivanja ličnih i zajedničkih aktivnosti, te zastupa interese studenata Šumarskog fakulteta u Sarajevu.

Član 2.

Naziv udruženja je: „**Asocijacija studenata Šumarskog fakulteta**“.

Skraćeni naziv udruženja je: „**ASŠF**“.

U međunarodnim odnosima Udruženje nastupa pod nazivom:

„**Students Association of the Faculty of Forestry**“

Član 3.

Udruženje djeluje na teritoriji Kantona Sarajevo. Sjedište Udruženja je u Sarajevu, ul. Zagrebačka 20, opština Novo Sarajevo.

Član 4.

Udruženje ima svoj pečati i znak.

Pečat je pravougaonog oblika na kojem su prikazana dva studenta koji drže knjigu ispod drveta. U pečat je upisan puni skraćeni naziv udruženja „ASŠF“ kao i puni naziv „Asocijacija studenata Šumarskog fakulteta“ na bosanskom jeziku.

Izgled znaka, te način, upotrebe i čuvanja pečata utvrđuje se posebnim aktom koji donosi Upravni odbor Udruženja.

Član 5.

Temeljni akt Asocijacije studenata Šumarskog fakulteta u Sarajevu je Statut.

Član 6.

Statutom se pobliže određuju temeljne odredbe i uređenje Udruženja, način odlučivanja njegovih tijela, te druga pitanja od značaja za rad Udruženja.

Član 7.

Statut donosi i mjenja Skupština Asocijacije studenata Šumarskog fakulteta u Sarajevu dvotrećinskom većinom svih članova skupštine na prijedlog Upravnog odbora.

Član 8.

Udruženje zastupaju predsjednik i potpredsjednik Udruženja u slučaju odsustva predsjednika. Mandat za zastupanje i predstavljanje su 2 (dvije) godina sa pravom 1 (jednog) reizbora.

Član 9.

Udruženje se može udruživati u kantonalne, federalne i državne studentske saveze ili udruženja, te međunarodna studentska udruženja kao i sa ostalim formalnim ili neformalnim grupama.

Pregovore i ostale neophodne procesne radnje izvršava predsjednik ili po potrebi drugi članovi Udruženja ovlašteni od predsjednika ili Upravnog odbora, koji su dužni da o tome u roku od 20 (dvadeset) dana obavijeste predsjednika i Upravni odbor, koji tu odluku razmatra i donosi konačnu odluku.

II. CILJEVI I DJELATNOSTI UDRUŽENJA

Član 10.

Ciljevi Udruženja su:

- Razvoj stručnih, naučnih, administrativnih, ekonomskih, socijalnih, kulturnih, sportskih, humanitarnih, inovacijskih, dobrovoljnih i drugih aktivnosti u vezi s tim, te zadovoljavanje drugih potreba i interesa članova Udruženja u skladu sa Zakonom.
- Zalaganje za interese studenata Šumarskog fakulteta, članova Udruženja, te predstavljanje istih tamo gdje je to potrebno.
- Zaštita standarda i drugih neposrednih interesa studenata i članova Udruženja, te zalaganje za poboljšanje uslova obrazovanja.
- Okupljanje studenata i njihovo učlanjivanje, te popularisanje Udruženja među istima putem stručnih praksi, različitih društvenih i sportskih sekcija, izleta, seminara, kurseva, projekata, stipendija i slično.
- Razvoj međusobne saradnje sa asocijacijama i udruženjima studenata ostalih fakulteta Univerziteta u Sarajevu, kao i saradnja i članstvo u Studentskom Parlamentu Univerziteta u Sarajevu (SPUS).
- Razvoj međusobne saradnje sa inostranim studentskim asocijacijama i udruženjima.
- Obezbjedjivanje materijalnih sredstava u cilju normalnog finansiranja rada i djelatnosti Udruženja.

Član 11.

U svrhu ostvarenja svojih ciljeva Udruženje obavlja sljedeće djelatnosti:

- Obavljanje stručnih, administrativnih i drugih poslova za članove Udruženja.
- Okupljanje studenata Šumarskog Fakulteta, bez obzira na godinu studija, status, smjer ili neko drugo obilježje, i učlanjivanje istih u Udruženje.
- Unapređivanje rada i poslovanja članova Udruženja uz primjenu tehničkih i tehnoloških dostignuća kojima će se obezbijediti racionalnije korištenje materijala i energije.
- Izrada razvojnih planova Udruženja.
- Saradnja sa sredstvima javnog informisanja, sudjelovanje u različitim manifestacijama interesno povezanih sa ciljevima i djelatnostima Udruženja, razvijanje i njegovanje dobrih običaja Udruženja.
- Razvijanje međusobnih kontakata, informacija i iskustava i provođenje aktivnosti u oblastima koje su interesno povezane sa ciljevima i djelatnostima Udruženja.
- Udruženje može u okviru svoje djelatnosti i programskih ciljeva osnovati sektore za različite djelatnosti, a sve u cilju unapređenja aktivnosti Udruženja.
- Udruženje razmatra i druga pitanja od zajedničkog interesa.
- Udruženje ostvaruje saradnju sa upravom Šumarskog fakulteta u Sarajevu, sa Univerzitetom u Sarajevu te sa Ministarstvom obrazovanja.
- Udruženje izvršava i druge zadatke i obavlja poslove koji doprinose zaštiti interesa studenata i članova Udruženja.
- Udruženje predstavlja studente, te njihova pitanja i probleme upravi Šumarskog fakulteta, te zajedno sa istom nastoji riješiti pitanja i probleme.

Član 12.

Načela djelovanja Udruženja su: poštivanje različitost stavova, misli i ideja, sloboda izbora, ravnopravnost, samostalnost organizacije u radu, javnost i demokratičnost mišljenja, te odgovornost pojedinca i organizacije.

III – ČLANSTVO, PRAVA I OBAVEZE

Član 13.

Članovi Udruženja mogu biti svi studenti Šumarskog fakulteta koji prihvataju program Udruženja.

Članovi Udruženja plaćaju članarinu Udruženju na dobrovoljnoj osnovi čiju visinu utvrđuje upravni odbor Udruženja.

Studenti koji su u radnom odnosu sa fakultetom i Univerzitetom, ne mogu biti birani na rukovodeće funkcije Udruženja (Upravni odbor, predsjednik, sekretar) radi mogućeg sukoba interesa.

Članstvo u Vijeću prestaje:

- Završetkom studija na Šumarskom fakulteta Univerziteta u Sarajevu, osim u slučaju članova Udruženja koji su izabrani u Upravni odbor, Nadzorni odbor, na poziciju predsjednika, potpredsjednika i generalnog sekretara kojima članstvo u Vijeću prestaje po završetku mandata.
- Dobrovoljnim istupanjem putem pisanog zahtjeva proslijeđenom predsjedniku, Upravnom ili Nadzornom odboru Udruženja.
- Isključivanjem zbog povrede Statuta ili drugih dokumenata Udruženja.

Odluku o isključenju iz članstva donosi Upravni odbor Udruženja.

Član 14.

Prava članova su: sudjelovati u radu Udruženja; birati i biti biran u tijela Udruženja; davati mišljenja, prijedloge i ocjene o radu Udruženja.

Član 15.

Obveze članova su: pridržavati se Statuta, načela, smjernica i odluka tijela Udruženja; izvršavati obaveze koje su im povjerene; čuvati i unapređivati ugled Udruženja.

Član 16.

Ukoliko pojedini član Udruženja narušava programske ciljeve i zadatke Udruženja, on se upozorava od strane predsjednika, po sprovedenom postupku, da svoje djelovanje uskladi sa programskim ciljevima i zadacima Udruženja.

Postupak iz prethodnog stava se pokreće na inicijativu bilo kojeg člana Udruženja i on sadrži utvrđivanje odgovornosti člana protiv kojeg se vodi postupak.

Poslije utvrđene odgovornosti članu Udruženja prosljeđuje pismeno upozorenje od strane predsjednika da uskladi svoje djelovanje sa ciljevima i zadacima Udruženja.

Predsjednik Udruženja će primiti prijedlog o sankcionisanju ili isključivanju, a konačnu odluku donosi Upravni odbor na svom zasjedanju.

Član 17.

Isključeni član ima pravo prigovora Nadzornom odboru u roku od 15 (petnaest) dana od dana dostave odluke. Upravni odbor je dužan odlučiti o prigovoru u roku od 30 (trideset) dana od dana dostave prigovora i njegova odluka je konačna.

Član 18.

Član koji istupi ili bude isključen iz Udruženja je dužan izmiriti obaveze prema Udruženju.

Eventualno o novom zahtjevu za prijem člana koji je istupio ili je bio isključen iz Udruženja, postupit će po proceduri predviđenoj posebnim aktom za prijem novog člana koji donosi Upravni odbor.

Član 19.

Skupština može imenovati i počasne članove Udruženja, počasni članovi mogu sudjelovati u radu Skupštine samo putem rasprava, prijedloga i sugestija, ali nemaju pravo odlučivanja. Počasni članovi mogu biti svi pojedinci koje Skupština imenuje bez ikakvih uslova.

Član 20.

Glasanje se vrši javno, osim ako Skupština donese odluku o tajnom glasanju.

IV – ORGANI ASOCIJACIJE STUDENATA ŠUMARSKOG FAKULTETA SARAJEVO

Član 21.

Organi Asocijacije su:

- Skupština
- Upravni odbor (u daljem tekstu UO)
- Nadzorni odbor (u daljem tekstu NO)
- Predsjednik Asocijacije studenata
- Potpredsjednik Asocijacije studenata
- Generalni sekretar

SKUPŠTINA ASOCIJACIJE STUDENATA

Član 22.

Skupština Udruženja je najviši organ Udruženja. Skupštinu Udruženja čine članovi predstavnici svih godina studija, predstavnici svih odsjeka. Skupština Udruženja treba brojati 16 (šesnaest) članova. Mandat članova Skupštine traje 1 (jednu) godinu, a članove skupštine delegiraju studenti pojedinih godina najkasnije mjesec dana nakon početka akademske godine.

Član 23.

Skupština može zasjedati ako je prisutno više od polovine članova Skupštine. Ukoliko član Skupštine neopravdano izostane sa zasjedanja Skupštine tri puta, automatski se isključuje iz Skupštine, a zamjenik se imenuje u roku od 7(sedam) dana. Odluke Skupštine su valjane ako su donesene većinom glasova prisutnih članova.

Član 24.

Član Skupštine Udruženja ima sljedeća prava i dužnosti:

- učestvuje u radu i odlučivanju ravnopravno sa ostalima,
- pokreće raspravu,
- podnosi prijedloge i postavlja pitanja,
- pokreće inicijative za pojedine akcije i mjere kojima se unapređuje rad i djelovanje Udruženja,
- pokreće inicijative za izmjene i dopune opštih akata Udruženja,
- radi na izvršavanju svojih zadataka na načelima ravnopravnosti, uzajamne odgovornosti i solidarnosti, programa rada i zadataka Udruženja.

Član 25.

Sjednicom Skupštine Udruženja predsjedava predsjednik Skupštine na prijedlog predsjednika Asocijacije, koji se bira na mandat od 2 (dvije) godine, sa pravom jednog reizbora.

Mandat člana prestaje prestankom statusa studenta, danom podnošenja ostavke i ako u posljednje dvije godine studija nije sakupio minimalno 60 ECTS bodova

Član 26.

Nadležnosti predsjednika skupštine su:

- Saziva skupštinu i predsjedava istoj;
- Stara se o ostvarivanje programa rada skupštine;
- Predlaže skupštini mjere i postupke za efikasnije ostvarivanje funkcije Udruženja;
- Potpisuje akte koje donosi skupština;
- Lično je odgovoran za svjesno i ažurno obavljanje poslova;
- Stara se o sprovođenju Statuta i drugih akata skupštine.

Član 27.

U slučaju odsustva predsjednika Skupštine zamjenjuje ga podpredsjednik, koji u tom slučaju ima sve nadležnosti i ingerencije kao predsjednik skupštine.

Podpredsjednika Skupštine imenuju predsjednik Skupštine i Predsjednik Udruženja.

U svom zahtjevu za sazivanje skupštine, predlagači su obavezni predložiti dnevni red sjednice. Od dana sazivanja do dana održavanja zasjedanja Skupštine mora proći najmanje 7 (sedam) dana.

Član 28.

Skupština Udruženja je redovna i vanredna.

Redovna skupština se održava najmanje jednom godišnje, a vanredna po potrebi, na prijedlog Upravnog odbora, Predsjednika Udruženja, Predsjednika Skupštine ili na pismeni zahtjev 1/3 članova.

Član 29.

O održavanju redovne i vanredne sjednice Skupštine, članovi se obavještavaju pismenim putem. Pozivi, obavještenja i dnevni red, moraju se dostaviti članovima najmanje 7 (sedam) dana prije održavanja Skupštine.

Pozive i materijale za Skupštinu Udruženja zajednički pripremaju predsjednik Udruženja, predsjednik Skupštine Udruženja i sekretar Udruženja.

Član 30.

Skupština, kao najviši organ udruženja je nadležna za:

- donosi statut, izmjene i dopune statuta i druge akte određene statutom;
- daje saglasnost na pravne radnje poduzete u postupku osnivanja udruženja;
- bira i opoziva članove upravnog odbora ili, ukoliko statutom upravni odbor nije predviđen kao poseban organ, imenuje i opoziva lice ovlaštenja za zastupanje i predstavljanje udruženja;
- usvaja izvještaje koje je pripremio upravni odbor ili lice ovlašteno za zastupanje i predstavljanje,
- odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama udruženja;
- odlučuje o svim pitanjima koja nisu u nadležnosti drugog organa;

Član 31.

Skupština može izglasati nepovjerenje Izvršnom ili Nadzornom odboru ukoliko Upravni ili Nadzorni odbor ne izvršava svoje zadatke i poslove. Nepovjerenje Upravnom ili Nadzornom odboru se izglasava 2/3 (dvotrećinskom) većinom prisutnih članova Udruženja.

V – UPRAVNI ODBOR

Član 32.

Upravni odbor koji broji 6 (šest) članova je izvršni organ Skupštine kojeg čine predsjednik Udruženja, potpredsjednik Udruženja, sekretar i predstavnici stalnih sektora udruženja.

Upravnim odborom predsjedava predsjednik Udruženja.

Mandat članova Upravnog odbora je 2 (dvije) godina sa pravom jednog reizbora.

Mandat člana prestaje prestankom statusa studenta, danom podnošenja ostavke, ako u posljednje dvije godine studija nije sakupio minimalno 60 ECTS bodova i isključenjem nadležnih organa.

Upravni odbor donosi odluke na sjednicama na kojima je prisutna većina članova. Odluke se donose većinom prisutnih članova. Potpredsjednika i sekretara Udruženja može predložiti bilo koji član Skupštine, dok konačnu i samostalnu odluku o imenovanju donosi predsjednik Asocijacije.

Član 33.

Prava i dužnosti predsjednika Upravnog odbora:

- Predsjednik Udruženja je i Predsjednik Upravnog odbora. Predsjednik predstavlja Udruženje u zemlji i inostranstvu.
- Predsjednik za svoj rad odgovara Skupštini;
- Predsjednik je ovlašteno i odgovorno lice Udruženja koji predstavlja Udruženje u zemlji i inostranstvu te zaključuje međunarodne sporazume.
- Predsjednik saziva, organizuje i presjedava sjednicama Upravnog odbora
- Predsjednik predlaže dnevni red sjednice, odgovoran je za primjenu Poslovnika o radu Upravnog odbora
- Predsjednik potpisuje akta koje donosi Upravni odbor
- Ovlaštenja predsjednika Udruženja, u slučaju njegove odsutnosti, spriječenosti ili prijevremnog završetka mandata, prelaze na potpredsjednika.
- Predsjednik ima pravo uskratiti potpis na odluke Upravnog odbora za koje smatra da nisu u skladu sa ciljevima Udruženja, o čemu konačni sud daje Skupština nadpolovičnom većinom prisutnih članova. Ukoliko Skupština potvrdi stav Upravnog odbora Predsjednik Skupštine će dati supotpis na spornu odluku u ime Skupštine.
- Predsjednik se stara o izvršavanju odluka i obavlja druge Statutom utvrđene poslove.
- Predsjednik ima ovlaštenje finansijskog nalogodavca uz supotpis Sekretara u odnosu na sredstva i imovinu Udruženja pod uslovom da je prethodno pribavljena saglasnost Upravnog odbora. U slučaju spriječenosti može ih prenijeti na lice koje on ovlasti uz saglasnost Upravnog odbora.
- U slučaju da predsjednik ili bilo koji drugi član Upravnog odbora prestane vršiti svoju dužnost, Nadzorni odbor je obavezan pokrenuti postupak kojim će se utvrditi odgovornost predsjednika i svoj zaključak proslijediti Upravnom odboru Udruženja u roku od 20 (dvadeset) dana.
- Predsjednika na prijedlog Nadzornog ili Upravnog odbora smjenjuje Skupština 2/3 (dvotrećinskom) većinom članova Skupštine.

Član 34.

Upravni odbor saziva predsjednik ili po njegovom ovlaštenju potpredsjednik ili sekretar. Sjednica Upravnog odbora se mora sazvati na zahtjev najmanje dvoje njegovih članova.

Član 35.

Sekretar priprema svu dokumentaciju odnosno obavlja sve stručno administrativne poslove.

Član 36.

Da bi akti koje donosi Udruženja bili valjani, potrebno je da ih potpiše predsjednik ili potpredsjednik u odsustvu predsjednika. Upravni odbor donosi interne akte Udruženja.

Član 37.

Upravni odbor vrši sljedeće poslove i zadatke:

- organizuje prijem članova i udruženja,
- priprema i predlaže nacrt izmjena Statuta i drugih akata koje donosi skupština,
- priprema i saziva sjednice Skupštine Udruženja,
- izvršava Odluke i zaključke Skupštine,
- upravlja imovinom i sredstvima Udruženja,
- organizuje stručnu službu za vođenje administrativnih i finansijskih poslova,
- ostvaruje saradnju sa nadležnim državnim organima i sredstvima javnog informisanja,
- donosi Odluku o troškovima za službena putovanja za potrebe udruženja,
- imenuje Komisije kao pomoćna tijela za utvrđene zadatke iz njihovih nadležnosti,
- donosi Plan rada i aktivnosti za narednu godinu
- donosi Finansijski plan za narednu godinu
- priprema i podnosi Izvještaj o radu Skupštini,
- donosi Poslovnike o radu Upravnog odbora i Komisija koje osniva,
- imenuje studentske predstavnike u skupštini Studentskog Parlamenta Univerziteta u Sarajevu,
- imenuje studentske predstavnike u tijelima Šumarskog fakulteta po potrebi,
- vrši i druge poslove od interesa za Udruženje koji nisu u nadležnosti Skupštine.

Član 38.

Mandat članova Upravnog odbora traje 2 (dvije) godinu sa pravom jednog reizbora.

Članovi Upravnog odbora mogu biti razrješeni dužnosti i prije isteka roka na koji su izabrani:

- na vlastiti zahtjev
- ako ne postupaju u skladu s uputama i smjernicama Skupštine
- ako djeluju protivno Zakonu ili Statutu
- ako svojim djelovanjem štete ugledu Udruženja
- odlukom nadpolovične većine članova Upravnog odbora
- disolucijom Udruženja.

Član 39.

Za obavljanje programskih ciljeva i zadataka Udruženja, Upravni odbor imenuje sljedeće sektore:

- Sektor za kulturu, sport i sportska pitanja
- Sektor za informisanje i odnose sa javnošću
- Sektor za međunarodnu saradnju

Sektorima rukovode rukovodioci sektora koje imenuje Upravni odbor. Upravni odbor može, ukoliko smatra potrebnim, osnovati dodatne sektore i odrediti im rukovodioce. Za ostvarivanje svojih funkcija Upravni odbor formira stalne i ad hoc radne grupe. Poslovníkom o radu Upravnog odbora utvrđuje se sastav, broj i način rada radnih grupa.

VI – NADZORNI ODBOR

Član 40.

Nadzorni odbor se formira sa zadatakom praćenja zakonitosti rada Udruženja o čemu, najmanje jednom godišnje, podnosi izvještaj Skupštini.
Nadzorni odbor se bira iz redova članova Skupštine i provodi disciplinski postupak i izriče mjere članovima Upravnog odbora.
Nadzorni odbor broji 3 (tri) člana.
Nadzorni odbor iz svog reda bira Predsjedavajućeg.
Članovi Nadzornog odbora ne smiju biti članovi Upravnog odbora.
Mandat članova Nadzornog odbora je 1 (jedna) godina sa pravom reizbora.
Mandat prestaje: istekom, ostavkom ili razrješenjem.
U slučaju prestanka dužnosti članova Nadzornog odbora, Skupština je dužna pokrenuti postupak izbora novih u roku od 20 (dvadeset) dana.

Član 41.

Nadzorni odbor ima sljedeće nadležnosti:

- vrši nadzor rada Udruženja,
- nadgleda finansijsko-materijalno poslovanje Udruženja,
- iz svoje oblasti daje inicijative Upravnom odboru,
- podnosi druge prijedloge i primjedbe Upravnom odboru i Skupštini Udruženja.

Član 42.

O uočenim nepravilnostima Nadzorni odbor izvještava mjerodavno tijelo Udruženja, a ukoliko ono ne ukloni nepravilnosti u svom djelokrugu, Nadzorni odbor izvjestit će nadležno tijelo državne uprave.

Član 43.

Nadzorni odbor odluke donosi na svojim sjednicama koje se održavaju po potrebi, a odluke se donose nadpolovičnom većinom članova Nadzornog odbora.

VII – JAVNOST RADA UDRUŽENJA

Član 44.

Rad Udruženja, njenih organa i radnih tijela je javan.
Javnost rada se obezbjeđuje putem javnih sjednica, stalnog i povremenog izvještavanja studenata o aktuelnim pitanjima Udruženja.
Izuzetno, pojedine sjednice organa i tijela mogu biti zatvorene za javnost, i u tim slučajevima poslije održane sjednice bit će dato zvanično saopćenje.

Član 45.

Izuzetno poslovna tajna se neće saopćavati javnosti.

Poslovnu tajnu sačinjavaju isprave i podaci čije bi saopćenje neovlaštenim licima bilo protivno poslovanju i štetilo ugledu i interesu Udruženja.

Članovi Udruženja su dužni čuvati poslovnu tajnu.

Odavanje poslovne tajne povlači i krivičnu odgovornost, kao i materijalno-pravnu i moralnu odgovornost regulisanu pravilnikom o načinu rada Udruženja.

VIII- NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU UDRUŽENJA

Član 46.

Upravni odbor donosi na kraju kalendarske godine Izvještaj o radu Udruženja i Finansijski izvještaj i isti se prezentira Skupštini na usvajanju.

Izvještaji se smatraju usvojenim kada se za njih izjasni najmanje (2/3) prisutnih članova na Skupštini Udruženja.

Ukoliko se isti ne usvoji vratit će se Upravni odboru na doradu, i prezentovat će se na prvoj sjednici Skupštine.

IX- POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA UDRUŽENJA

Član 47.

Kada se utvrdi da postoje opravdani razlozi, Skupštini Udruženja može se podnijeti zahtjev za donošenje novog Statuta ili izmjene i dopune postojećeg Statuta.

Inicijativu mogu podnijeti:

- 1/3 članova Udruženja
- Upravni odbor Udruženja
- Nadzorni odbor.

Inicijativa se dostavlja Predsjedniku Skupštine koji istu prezentira na prvoj sjednici skupštine i ako je opravdana, dostavlja Upravnom odboru radi izrade prijedloga Statuta ili prijedloga izmjene i dopuna statuta.

Član 48.

Utvrđene prijedloge Upravni odbor dostavlja Skupštini na usvajanju.

Prijedlozi su usvojeni ako je za njih glasalo najmanje (2/3) prisutnih članova na Skupštini Udruženja.

X – TRANSFORMACIJA, PRIPAJANJE, RAZDVAJANJE UDRUŽENJA

Član 49.

Udruženje se može udruživati u:

- Savez udruženja koja se bave istom problematikom
- I sa drugim udruženjima i nevladinim organizacijama koje imaju iste ili slične ciljeve

Udruženje se može pripojiti drugom udruženju, ili drugoj nevladinoj organizaciji, može se razdvojiti na dva ili više udruženja i može se formirati u drugi oblik, o čemu Skupština donosi odluku u kojoj će regulisati šta sa imovinom za slučaj nastanka navedenih promjena.

Udruženje može biti član raznih NVO mreža, udruženja od lokalnog do međunarodnog nivoa. Odluku o ućlanjenju iz prethodnog stava donosi Upravni odbor.

XI – FINANSIJSKO-MATERIJALNO POSLOVANJE

Član 50.

Finansijsko-materijalno poslovanje Udruženje obavlja se u skladu sa zakonskim propisima i podliježe kontroli Nadzornog odbora Udruženja.

Član 51.

Finansijska i materijalna sredstva Udruženja obezbjeđuje iz budžeta Šumarskog fakulteta, budžeta Studentskog Parlamenta Univerziteta u Sarajevu i od dobrovoljnih uplata studenata pri upisu u školsku godinu u maksimalnom iznosu do 5,00 (pet) KM po studentu.

Finansijska sredstva Udruženje obezbjeđuje dodatno od:

- samofinansiranja
- donacija, poklona
- sponzorstava

Obim, namjena i raspodjela finansijskih sredstava utvrđuje se finansijskim planom za svaku godinu. Obim, namjenu i raspodjelu sredstava neutvrđenih finansijskim planom odobravaju Predsjednik i Upravni odbor.

XII – PRELAZNE I ZAVRŠNE ODREDBE

Član 52.

Udruženje prestaje sa radom ukoliko Skupština dvotrećinskom (2/3) većinom donese Odluku o prestanku rada Udruženja. U slučaju prestanka rada Udruženja, imovina se ostavlja Šumarskom fakultetu Univerziteta u Sarajevu.

Član 53.

Van snage se stavlja statut donešen 19.03.2009 godine
Ovaj Statut stupa na snagu danom usvajanja na Skupštini Udruženja održanoj dana,
27.12. 2016. godine.

Sarajevo, 27.12. 2016. godine